

***TATAA LEE JONMO LEE,
PANA DENE YAIN***

Tataa lee jɔnmɔ lee ana ne giye yowaai. Giye go ɔgiyaa, yaanw go lee unrunw go lee pana kayanu sene. Aga ingelaa ye unrunw go be babei seen. Be puu dɔɔaa, komaa paɔa tobene.

Bai turu, aga ingelaa tataa lee jɔnmɔ lee, unrunbe ɔn gin' biye dei , olu go yai ye pana dagaa bebeemɔ ma yenemɔ gin. Kunrin be lei gowaa pana denei yain.

Be, yaa, yaa, olu solo go peu peu yowaa, ojujai turu ne dɔin. Tataa lee jɔnmɔ lee nee yagoo pene go yaa ire ma inin. Tataa gowaa numɔ nana oju go aamɔ gi. Jɔnmɔ ai, numɔ iin oju go aamɔ gi. Be lei logoro ne jiiru yowaa, ine kanma oju wo gi go aa be lei kabaain. Tataa numɔ nana oju go aa yai. Jɔnmɔ numɔ iin oju go aa yai.

Tataa, wo yaau wo yaau, yaa ɔɔaa, kije kanma beelu. Kije kakayi ga wo bei akegun turu.

Giye woi daado ga be digeu, akegun go aau digeu, lagulagu miraanje. Waja denrun go puu ne kije kanma iyelu.

Jɔnmɔ numɔ iin oju go ne yaau, yaau, kije kanma beelu. ɔɔaa yaa dain wo dɔi go, wo ɔɔna turu iyaa, kini go ne yowaa deinyin.

Deinyaan «haa...hai ! Hei ɔɔna ɔn kini eli wɔɔ ! » Kɔɔ gin' wo giyaa, ɔɔna go saa, womaa kini unrunmɔi newun laa, kuro unrunmɔ newaanbe ma wa. Jɔnmɔ unrun newenlun wa. ɔɔna go kuro unrunmɔ koturu bagamaa jɔnmɔ gene ne wiyaa sugu. Jɔnmɔ jepaa kuro go tenwaan, « Aa ! Hei kuro uwɔ ɔn eli wɔɔ ! »

ɔɔna womaa kuro unrunmɔi newun laa, pepele unrunmɔ newaanbe ma wa. Jɔnmɔ unrun newenlun wa. Wo pepele turu bagamu. Jɔnmɔ jepaa tenwaan, « hei pepele uwɔ ɔn eli wɔɔ ! »

ɔɔna womaa pepele unrunmɔi newun laa, geɔe unrunmɔ newaanbe ma wa. Jɔnmɔ unrun newenlun wa. Wo iyaa geɔe turu bagamu. Jɔnmɔ jepaa tenwaan, « hei geɔe uwɔ ɔn eli wɔɔ ! »

ɔɔna womaa geɔe unrunmɔi newun laa, tigeɔe unrunmɔ newaanbe ma wa. Jɔnmɔ unrun newenlun wa. Wo tigeɔe turu bagamaa sunugu. Jɔnmɔ jepaa jɔɔaa ɔɔaa, « hei tigeɔe uwɔ ɔn eli wɔɔ ! »

Ɖɔɔna iyaa saa ɔɔ, womaa kole ƙɔɔ unrunmɔ ne kije too iyaabe ma wa. Jɔnmɔ unrun iyelun wa. Kole womaa « Ɖɔɔna waan kanran » gɛɛ wa. Jɔnmɔ « ɔɔna waan kanran » gi. Ɖɔɔna unruin waan kanraan pineraan wo kanran, ƙɔɔ go ne kije eju puu yato : Pana ɛɛlu ɛɛlu tɔgu dɛin dɛinbe, sɔi eju ejube, tagabe, kangebe, sarudube, luluube, dugɔibe, aduna ɔn ne kije ine kaii wɔɔ puu kone jowaa too.

Ɖɔɔna go saa, jɔnmɔ womaa kije kai wo sɛɛ puu goonujɛɛ wa. Jɔnmɔ, pana, taga, kange, luluu, sarudu, sɔi, puu aɲai wo dɛneje gin' goonaabe. « Koi ɔɔna kɛmu kanran » gɛɛ wa. Jɔnmɔ, « ɔɔna kɛmu kanran » wo giyaa, ɔɔna go wiyaa tunmɔ le kɛmu timiyaain.

Jɔnmɔ kije ƙɔɔ puu balaa jungiin gɛliyaa, ginrun wo maranw ne jɛɛlu. Be puu kine ɛɛli le woi sɛgeraa, be pana kayaa, kije eju tɔgu puu biyaabein.

Tataa kai kije kanma bɛɛlu. Jɔnmɔ, pana wo jɛɛlu go be ne wo obaa, be wogo kayaabein. Tataa maranw, wo le kine banraan kinejiun le bein.

Tataa, jɔnmɔ womaa kije ƙɔɔbe yagoo bei ma gi. Jɔnmɔ saa unrun ɔɲaa gabaa, ɔɔna turu kine ne dɛinyaan, kine go ɛɛli wɔɔ unrun giyaa, ɔɔna go, kine unrunmɔi newun ma, kurɔ unrunmɔ newaanbe ma wa ? “Kunrin ɔɔna go ne kije gooje puu, kurɔ go lee, loru go lee, gɛɲɛ go lee, tigɛɛ go lee newaan donugaa mu kanran, ƙɔɔ unrunmɔ ne kije too iyaabe ma gi. Iyelun mu giyaa, « ɔɔna waan kanran » gɛɛ wo giyaa, mu giyaa, ƙɔɔ go kije eju puu le jowaa bee. Mu kije kai mu sɛɛ puu yin goonun.”

Tataa saa jɔnmɔ womaa ɔɔna go yalu daan unrun ne taga wa. Jɔnmɔ tiye le wo tagaa, tataa agapaali ingelaa ɔɔna go doɲu ne yai. Kini womɔ ɛɛli wɔɔ gi. Ɖɔɔna womaa kine unrunmɔi newun laa, kurɔ unrun mɔ newaanbe ma gi. Kurɔ go wo ne obu. Kunrin tataa newen newen yaa ɔɔna waan kanran wo giyaa, ɔɔna waan kanraan pinelu. Ƙɔɔ go ne kije eju too gɔbe puu wo yɛnu go, “ɔɔna kɛmu kanran” wa. Ɖɔɔna kɛmu kanraan pinin. Tataa, unrun ɔɔna go duiyaa ye ginrun unrunmɔ ne jɛɛlaa ye, unrun lee unrun maranw lee sai kije eju ƙɔɔbe puu niwen kayanu biyɛdɛin ga bein. Kunrin, tataa saa “ɔɔna sooruu kanrun ye kuu ma ne dɛinyɛn” gi. Ɖɔɔna sooruu kanran tataa kuu ne dɛinyin. Tataa duiyaa ginrun unrunmɔ ne wei. « Ɖɔɔna sooruu kanrun ye gonɔ ma ne dɛinyɛn » wo giyaa, ɔɔna dɛru ! Pilemaa gi. Ɖɔɔna saale. Tataa iyaa pilemaa ɔɔna go yalu daanbe go ne woi jɛɛlaa, « ɔɔna sooruu kanrun ye yalu uwɔ ne dɛinyɛn » wo giyaa, ɔɔna go sooruu kanran yalu unrunmɔ ne wiyaa dɔmu dɛinyin. Nɛɛ tataa unrun kije

eju gamuu goonu ye ginrun jeyaado ga « ɔɔna waan kanran » wo giyaa, ɔɔna deru!
« Waan kanran » wo giyaa, deru ! Tataa kije kanma bælu pilemaa ginrun wei.

WOMO DENEBARA, DENEGAMAI TAIJAIN

Enwenren ɔn nɛ deeru bæmɔje

Aduna ɔn nɛ iye Amai jugu giye yato. Inew joo Amai inin go dei ɔje diyɛ nɛ toin. Tataa lee jɔnmɔ lee maranw aɲai bein gin' be yeeriye diyɛ nɛ toin. Kunrin tataa lee jɔnmɔ lee gin' inew joo kuu unrunbeme lee, be maranw lee dei goɲoɲoun yani kinejamu bædein, yani Amai iyedein, yani diyedon siyedein ma denɛuwɔin. Be yogo beme dei diyedon turu kanran sɛnɛ.

Aiwa, kai emɛ puu ɔɔna, Ama emɛ nɛ obaaje. Wogo AMA SƆƆ, BIBELE go woi. U bana dein dein le ɔɔna kɔɔ nɛ kije gooje newen bæbedou. Kaa sigɛ le u kɔɔ womo pinelaa kuu uwɔ le iyaaje ye, eju le jowaa wo wɔɔ jujukɔdou. Adama ii aai kanran, Bible jepaa, kɔɔ womo yenaaje baɲa, kai womo puu kije kone yato ga ihiyedo. Jɔnmɔ aɲai kanrun gin' kije kai u sɛɛ puu waaru wooi kone wɛɛ goonu bæbedou.

Kaa Bible u turu sai mɔi laa. Tataa gin' u turu sai tee eju womo kayanu biyedo gɛɛnɔu. Bible, inew puu niwein. Jɔnmɔ kanrun gin' kone aɲai eju too go inew wajunw bere taga. Bible nɛ yai ye jaɲu ye asuu tine go be bæmɔ.

Ama, inɛi wo maɲu. Wo adama unrunw puui ibɛɛwɔ. Inɛ, ɔje nɛ lee yeeriye nɛ lee toiyo ga Ama diɲei laa. Inɛ, wo le bɔɔi bii eju siye ye jamu le biye ga, Ama kije deneje go woi. U Ama sɔɔ Bible, waaru puu jajaɲaje, sɔɔ go le yabu ye wogo le keukeu yayaaje ye, Ama le bɔɔi bii uwɔ babariyedo. Wogo duba tɔgu puu u nɛ jejeledo.

DON JAIJU DEYAA YE, KUU UWɔ LE BIBELE Kɔɔɔ Nɛ EJU TOO GɔBE BEE !

Inɛ tɔɲu go: Timotée KODIO